


類笈王右丞文集

卷三  
卷四





			三三九	漢書門
	二十	九	八	
一	十	五	號	
冊	架	函	類	

庫文閣內			
三四	三三		漢
函	九		書
一	一	八	
九	〇	號	類
架	冊		

內閣文庫	
番號	漢 3398
冊數	10 ( 9 )
函號	314 195





耀王右丞文集卷之三

淺草文庫

唐太原王維撰

明武陵顧起經編

碑

裴僕射濟州遺愛碑 并序

夫為政以德必世而後仁齊人以刑苟免而無  
恥則刑禁者難久百年安可勝殘德化者効遲  
三載如何考績刑以佐德猛以濟寬月期政成  
成而不朽者惟公能之公名耀卿字渙之河東

奇字齋

耀王右丞

吳應龍書

聞喜人也。益爲帝虞實相，帝舜非子其胄而已。諸裴在漢者爲水衡，在魏者守代郡。十三代祖徽、魏益、豫雍、兗、徐、五州刺史，蘭陵武公源於大賢派。以俊德世濟其美，不殞其名矣。曾祖正，隋散騎常侍、長平郡贊理祖。齊皇朝洛南，南鄭二縣令，著族斯茂。衣冠未敢爭雄，繼世皆賢英彥。無出其右，故有常侍縣君、遞輝迭映、父守忠、太常博士、判駕部、夏官、負外。今上楚王府，懿議參軍、邠寧二州刺史、贈晉、兗、沂三州刺史、文儒之

王誥

宗伯禮樂之本源，藉業雖曰承家，復始由乎種德。再典大郡，二爲仙郎，舉十大夫，是則是敷。且年不及壽而位未稱德，朝多其能，歿而獨贈，公則晉州之第三子也。語而能文，有識便智，爲兒則量過黃髮，未仕而心在蒼生。伯建試經，子淡應詔，古之人也。我不後之。八歲神童，舉試毛詩，尚書論語及第，解褐補祕書省校書郎。歷中宗、安國相王府典籤、東觀載筆、班固名香、西園賦詠、劉楨氣逸、轉國子主簿、檢校詹事府丞、學識

宜在儒林風度雅膺諸案河南府士曹參軍考  
功貞外郎公府屈廊廟之才曹無留事仙郎明  
黜陟之法野無遺賢右司兵部二郎中長安縣  
令其在舍香一臺推紗以之製錦四海是儀公  
之斷獄也必原情以定罪不阿意以侮法是以  
小失天二日出爲此州刺史公推善於國不稱  
無罪思利於人志其屈已戮豪右以懲惡一至  
無刑旌孝弟以勸善洪惟見德然侈務材訓農  
通商惠工敬教勸學授方任能行之一年郡乃

大理襁負而至何憂乎蕩相之人路不拾遺何  
畏乎穿窬之盜旣富之矣汲黯奚取於開倉使  
無訟乎仲由何施其折獄居無何詔封東嶽關  
東列郡頗當馳道至於犧牲玉帛資糧扉屨其  
或不供爲有司所劾因而厚斂非天子之意豐  
省之度多不得中故二千石有不能受事於宰  
旅者矣季孫請魯視邾滕濤塗恐師出周鄭抑  
爲是也公盡事君之心且曰從人之欲萬斯箱  
之粟茲乃如京百執事之人於我乎館四封之

何應亨  
境二爲帝庭一郡之賦再粒天下十卒林會襄  
牛谷量皆投足獲安端拱取給無虞燥濕不畏  
寇盜草莽之中用能使其體羈繼之外無所勞  
其力天朝中貴持權用事厚爲之禮則生我羽  
毛小不如意則成是貝錦公享有常牢覲無私  
幣冒貨賄者我以爲仇淫芻蕘者吾所能禦至  
於急宣忠旨暴征庶物或命嘉蔬先春當薦錫  
貢珍果非土所生舉是一隅其徒千計皆曾不  
旋踵若取諸懷又不知其備預之所以然也謂

餽牢竭矣而家有餘糧謂疲勞甚矣而人有餘  
力豈非積年之儲用之有度終身之逸使之有  
時不然班貢藝事輕重以列我視子男之國而  
倍公侯之征今日之事我爲上也六駕還都分  
遣中丞蔣欽緒御史劉日政宋珣等巡按皆嘉  
公之能奏課第一公未受賞朝而歸藩天災流  
行河水決溢蝗蟲避境雖馬援之化能然洪水  
滔天固帝堯之時且爾高岸萃以雲斷平郊豁  
其地裂噴薄雷吼沖融天廻百姓巢居主客有

其家室五稼波殄沼毛荒於畎畝公急人之虞  
分帝之憂御衣假寐對案輟食不候駕而星邁  
不入門而雨行議隄防也至則平板榦具糗糧  
揆形略趾量功命日而赤岸成谷白濤亘山雖  
有呂梁之人盡下淇園之竹無能爲也乃有壞  
防之餘衝波且盡僅在而危同累卵將墜而間  
不容髮公暴露其上爲人請命風伯屏氣以遷  
跡陽侯整波而退舍又王尊至誠未足加也然  
後下密捷塞長茨土簣雲積金鎚電散公親巡

何應亨

而撫之慰而勉之千夫畢飯始就飲食一人未  
息不歸遽廬惰者發憤以躒勤懦者自彊以齊  
壯成之不日金隄戡戡下截重泉上可方軌北  
河迴其竹箭東郡鬱爲桑田先是朝廷除公宣  
州刺史公惜九仞之垂成恐衆心之或怠懷絲  
綸之詔密金玉之音率負薪而益勤親執撲而  
彌勵旣成乃發書示之皆捨畚攀轅廢歌成泣  
淚而濟袂澤陰魯郊哀哀號呼不崇朝而達四  
境噫公之視人也如子人之去公也如父宜其

升聞於天司我五教公之富人也以簡簡則不  
擾而人得肆其業非富歟公之愛吏也以嚴嚴  
則畏威而吏不陷於罪非愛歟是其大旨也至  
若沛郡謂爲神明淮陽謝其清淨尊經於學校  
魯風載儒加信於兒童齊人不詐明閑視聽其  
察姦也無全曉習文法於決事乎何有六義之  
製文在於斯五車之書學半於我其爲身計保  
乎忠貞將爲孫謀賜以清白熊軾之貴子弟夷  
於平人龍門則高賓客不遺下士非禮不動出

言有章語曰愷悌君子人之父母其是之謂乎  
維也不才嘗備官屬公之行事豈不然乎維實  
知之維能言之况夫婦男女思我遺愛者吟咏  
成風耆艾人吏頌頌清德者道路如市則王襄  
所講彘斯之頌美政盛德綴詞之士固未嘗闕  
如也維敢拒之哉頌曰童子何如今公邁成人  
大不必佳兮公德日新天生德于公兮遺此下  
民天子命我兮守茲東郡人調公以謫去兮不  
能致訓公曾不魯私已兮政聲益振惟歲十月兮

帝封岱宗千乘萬騎兮行幸山東小郡之賦兮  
再粒萬邠豐不盈儉不陋兮公之舉也得中河  
為不道兮離常流以痛毒不用一牲兮不沈一  
玉身當中流兮馮夷感而避賢救陽兮侯使却  
走夫洪漣板築既具兮新又屬庶人欣以就役  
兮高岸掘起于深谷人降丘宅土兮秦田鬱以  
載綠行無五馬兮食不載味惠恤鰥寡兮威警  
黠吏公之德兮曾無與二人思遺愛兮淚淫淫  
歲久不衰兮至今性與天道吾不得聞兮誌其

小者近者兮已是過人之德音

京兆尹張公德政碑

并序○一作見唐文粹

雲從龍風從虎氣應也聖人作賢人輔德同也  
君臣同德天地通氣以康九有以遂萬類惟皇  
御極二十載光格四表至於海隅日出越小大  
邦蠻貊師長罔不欽于成憲以承天休然天子  
猶日省三揖一作接列辟曰一作日聽萬方輿頌懼  
人有未化賢有未登明敷仄陋兼乎十等選宗  
室及乎九族任事以觀材積時以觀行乃得我



賢京兆焉夫京兆號為難理清淨病於不給刀  
筆拘於守文或以軟弱廢或以賊殺劾把宿負  
淺為丈夫用鉤距蓋非長者我則異於是大道  
難名大理無法閉關於任數巧算不能知堅壁  
於畫一善政不能下摧宿豪如薙草無慍色視  
大權如歷塊無傲容百司之務總以奇而得正  
一作一德以咸服五方之人雜異教而同理受命之始  
先聲已振黠吏惡少聞風改一作行及乎鳴騶  
詣府登堂坐定縣尹掾史以次上謁守正之人

何鑑

其氣高含章之人其詞大見容色而聞號令小  
人戚一作感而君子泰日者櫟陽男子閭里為豪  
借客報仇聚人為盜或白日手刃或黃塵袖鎚  
政寬則以身先諸偷操急則以事中長吏貳過  
不已萬計自脫公命吏縛之立死領下於是人  
入閭室若遇大賓焉前年不登人頽太甚野無  
遺秉路有委骨天子不忍征於不粒賦於無衣  
六軍從衛以臨東諸侯息關中也帝曰咨天之  
降威人罔畏罪台恐寇盜迺邑矧曰蕩析離居

奇字齋

卷之三

惟爾克濟撫茲方夏一作西土公拜稽首思塞休命  
 布慈惠之政不以利淫振雷霆之威其或宥過  
 饗人減雙雞之膳匡人省五馬之秣陶不獻服  
 巧不填館自身已往振廩同食雖人煙不動道  
 殫相望不思濫以苟生咸守教以就死是不可  
 能也先是王公或專南山之利司農涸昆明之  
 池收赤岸澤將為田以便官至是悉奏罷之舟  
 鮫衡麓之守廢蒲荷薪蒸之產入自郊徂邑室  
 有魚殮斬陰伐陽市多山木人得以贍唯涇有

防比歲多決近縣疲於力役他山置於度材公  
 命刮朽壤填巨石辦大木去編管其始告勞乃  
 終有慶匠石日減功萬藏史日省錢億農始竟  
 學一作耒未女始安織於是台背黃髮之老一作耆曰  
 我有田疇鍾秉其畝我有子弟顏閑其行鄉黨  
 以睦恂子失其獨道路有禮祀汰無與爭酒先  
 養老賄不問吏既無吠犬亦無姦人臨年餘資  
 幸一作竊蒙惠化其曷以臻茲君子曰此天子至  
 公內舉不避親錫汝明君一作尹張公之力也夫

公於國爲外戚於帝爲外弟重組累印珥香貂  
者七葉奉車駙馬乘朱輪者十人勝衣則綺襦  
紈袴通籍則玉墀青瑣動則兩驂如舞坐則五  
鼎成列文軒楚製素女趙舞而公儼兮其若容  
淡兮其無味心在四教語稱七德目視六籍口  
誦九歌懷君子令德之忠保詩人錫類之孝悌  
有過於共被慈有踰於含食惡衣以居公服不  
敢降也屈體下士王綱不敢替也協二姓之好  
以正人倫旁無嬖御分一人之憂以審官政下

多英傑若夫皇帝敬問之詔御札自書天王命  
賜之衣上宮所製勞動則中使接武計議則走  
馬來朝豈唯衆臣重其經術爲吏雜以儒雅而  
已且公之德一作升聞於天非一朝一夕之漸也  
亦所以稱職於累官著聲於所在其丞祕書也  
闕文遺簡多在大家深爲子孫之藏密有緘滕  
之固公不憚權貴或抵或誘舊作畫非盡歸天閣官  
書備焉其牧郢下有也人有不若德戮之不爲  
暴人有不保居撫之不爲諂存者考其事壯其

食以畜之行者緝其宮藝其樹以待之此邦之  
 人既優他邦之人又重一作至焉未盈一歲遂增  
 萬戶其守汾也仍歲大旱郡祠介推雖屢舞僊  
 僊舊作仙非而靈應未若公命束蘊取火伐樹寘薪  
 釀酒而祝曰有功於人祀為明神無德而祿禍  
 亦覆餗自絳已來人實祀子純犧大璧不敢愛  
 必以薦也童兒季女不敢黷必以敬也神既靡  
 咎人將安仰若亭午而雨則樹其鷺羽執此駢  
 毛不然者火燎將至炊天鑠地靈衣且為煨燼

豐屋將為茂草爾其圖之言未畢而雲興拜未  
 起而雨降周於闔境不入他郡雖封疆咫尺而  
 彼竭我盈嘻若記能事載盛德渭川之竹不足  
 簡終南之木不足軸夫訓人至於禮義曰德安  
 人免於阡危曰功德者上賞於上下頌於下長  
 老孜孜願刊於石以予學於舊史來即我謀且  
 維與人編戶與人為伍與人出入與人言語知  
 風俗之淳弊識政化之源本屬詞媿文書事蓋  
 實詞曰五代相韓七葉侍漢及我聖朝亦生邦

翰大道無形貞蠱以幹含章不耀在割能斷情  
 偽萬端吾道一貫帝選賢尹無以易張金印紫  
 綬京兆之良一作章佩我鳴玉冠我兩梁天子休  
 命拜手以將寬而愛人立滅暴彊明明天子哀  
 此南畝將息西人遂覲東后我教我訓我鎮我  
 守茫茫三秦則罔餽口守死以義徇生不苟王  
 曰外第視人不佻何以寵之手書以詔何以問  
 之賜衣而朝俾人華胥致君帝堯刻石作頌永  
 世彌昭脫赤必二字

魏郡太守河北採訪處置使上黨苗公

政碑并序

五方殊俗魏風婉而其人舒九土異宜冀田壤  
舊作而其賦錯前政有寬猛之異時令有班藝  
懷非之差非夫酌舊典於可行啓新圖於必當多方  
 而不失正一貫而或從權曲成更人大抵厚俗  
 選衆而舉非公而誰公先自吏部侍郎出爲安  
 康郡太守某載月日詔以公爲魏郡太守河北  
 道採訪處置使公諱某字郡縣人也其出處本

末奕世冠冕國史家牒詳焉凡邦伯到官詔使  
按部或閉閣思政或下車作威或劾吏爲明或  
移書示禁公異於是可略而言公素號鮮明積  
有治行宿訟不決之務餘地割分疑獄自誣之  
枉容光立照故陋其思政也安全長吏不逐老  
丞成就諸生光教小史導德齊禮有耻且格故  
鄙其作威也謝亭長之問勞野次之賢吏悉謂  
爲神明人不隱其毫髮故無事効吏也列郡共  
職清節銷其過求諸曹報簿直筆破其污詆故

何大節

不待移書也山東古之七雄河北有其四國地  
方數千里人蓋億萬計獻子三歎之饋滋無舊  
德平原十日之飲顧有遺風朱亥袖鎚英雄扼  
腕曹王拂局輕薄爲心奢泰擬都護之堂遲緩  
學邯鄲之步公抑末技而敦本斥浮食以歸業  
督課八政擇良吏以遣行講求六籍置學官於  
便坐於是橫經左塾力穡先疇盡業農桑大典  
庠序家知禮義更式殿子之廬戶有京坻增修  
史起之貌鼓臺歌舞成市鄴郡帝王舊都衮服

靚粧挾筑怙屣淇上畱客河間數錢公課其組  
紆之庸開其婚嫁之節冶容絕四方之袖織室  
致五匹之工刑於上官訓及處子鄭聲衛樂共  
棄師襄趙帶燕裾思齊漆室漁陽騎客奏報本  
朝鯁海樓船連漕絕域郊迎館給不敢其芻  
蕘水路陸衢盡若安於枕席某載月日詔賜紫  
袍玉帶金魚袋衣若干副方伯十聯賴其澄清  
之轡天子七命賜以安吉之衣緹油屏車璽書  
增秩未是過也勝殘之化旣成觀俗之風允穆

何朝宗

優游無事學宦思歸況乎父母之邦近在嬰兒  
之國表請拜掃有詔許焉預約守宰幸無偵候  
至郡則投刺上謁至邑則舍車而徒展禮先塋  
推心泣血迴趨長老稽顙緒言宗人族姻姑黨  
姪行覲以重幣筐篚徧於里閭享有加牢牛酒  
溢於衢陌朱軒駟馬耀於衡門紫綬雙龜出入  
編戶蘇公佩印始歸鄉里盡歡疏傳散金不與  
子孫爲計迨乎將去仍以餘資一里置社備養  
生送死之具一鄉置校開閱禮敦詩之本相如

衣錦且飛大漢檄書買臣懷紱不德長安殿吏  
 故使巴蜀太守負弩前驅會稽守丞引章下拜  
 此蓋恨不禮於他日思釋憾於故鄉是輕桑梓  
 之人適騁斗筭之志豈若公自心而至率禮無  
 違來悅去思推才降體平陽傳舍不許望塵山  
 陰吏卒詎聞治道富貴還鄉榮之至也揚名顯  
 親孝之終也凡百君子無一至焉公當九伯之  
 官兼八使之任深總之體不求於無虞於  
 草竊政成德舉風動神行頃有勲臣勞典屬郡

曩者風雲際會攀附騰驤貪天之功以為己力  
 謂國不忘尚嘉迺勲宋父軍驕條侯倨貴當關  
 常從橫恣不法惟帳狗馬僭侈踰制公劾之則  
 重傷國恩置之則大廢邦典於是喻以禍福告  
 之話言昔有不愛趙城將蹈滄海既尊漢室願  
 遂赤松功成不居道家所躋至於析珪分組跨  
 壤連州懷四術而自疑見九重而失望或冤家  
 上變司敗受辭朝享膏梁寧知獄吏暮成菹醢  
 遍賜諸侯難恃白馬之盟徒思黃犬之樂彫牆

奇字齋

文集卷三

五



峻宇萬乘

紫衣狐裘一朝而數三罪

雖嫌絳灌等列不逾梁楚為墟於是翕肩振驚  
 折節度教杜門謝絕賓客終身不紊紀綱以寬  
 服人實在有德厥有挾左道飛訛言南國青珠  
 之符東海赤刀之術分風送客割水飲人偽辯  
 而納之於邪善誘而濟之以惡戶外多保汝之  
 屢恐為亂階舊作階非門前無長者之車知其惑眾  
 公奉誅首惡悉宥面從不蔽要囚惟長折獄議  
 事以制不徵於書副至仁之納隍用輕典於平

國刑期不濫人乃大安奏課計功天下小察責  
 吏以實則舉其不矜欲人自新則貫其宿負官  
 以德舉政以禮成至於賞善勸能正源端本齊  
 風變魯蓋以悉禮名儒晉盜奔秦豈俟多誅惡  
 少納貢獻賦則唯恐居後疇庸命賞則義不敢  
 先布以聖恩奉宣明主之詔問其理狀對用議  
 曹之言邦家之光其斯謂矣年若干秀才擢第  
 應制舉第若干等授某官歷某官若夫明眸白  
 皙玉潤珠耀美秀備於儀形風流發於言笑行

之方也。畱如守司智之圓也。速若發括量包羣有思入無間。壞壁古文。曲臺遺禮。淮王九師之易。漢氏三家之詩。傳癖書淫。鷹揚學府。比文園入室之武。同丞相登科之策。奏甚平讞。詩窮綺靡。硯燔紙貴。虎視詞林。嘗奉和聖製。雨中春望詩云。雨後山川光正發。雲端花柳意無窮。又奉和行幸詩云。接仗風雲動。迎軍鳥獸舞。時人以爲鮑參軍。謝吏部爲更生。曰某年月日。詔除公河東太守兼採訪使。官吏百姓等或守闕乞畱

或遮道。更借淚增時。雨思結仁風。親愛之深。名而號爲父。歌詠不足取。性以命其兒。公旣去官。多歷年所。人思愈甚。共立生祠。異邑居而瓦合無契約。而磨至恐不預於聚財。懼不任乎輸力。棠樹勿翦。何如審像圖形。桐鄉置祠。豈比耳聞身及。以此觀德。何德之深。仍建豐碑。立於祠宇。匍匐千里。前後百輩。永綴詞之客。爲頌德之文。維也。竊比老農不知舊史。衆心所至。難抑與於輿人。予病未能不獲。已於求我。乃爲頌曰。禹

別九州漢分八使寔惟方伯且曰連帥建節乘  
輶觀風察吏山東河北全趙大魏授方任能惟  
名與器蓋非其才孰享斯位天子命我導揚皇  
風敬教勸學通商惠工法去太甚政貴得中守  
丞老病小吏童蒙督郵不遂博士成功遂安賢  
者大啓儒宮四國之餘一都之會平原舊俗信  
陵遺態博塞以遊椎埋為害叢臺淇水燕裾趙  
帶淳化旁屬貞風倣載劈續卷綃橫經乘耒舊作  
乘耒清節峻邈碩量弘深投書置水酌酒捐金

樹德滋蔓持刑不淫訛言免坐倨貴懷音繡衣  
罷斧墨綬停琴既此時雨當聞作霖申哀松柏  
展敬桑梓伏謁公門徒行故里推心馬鬣啓顙  
鯢齒身紆紫綬禮及童穉帝賜黃金盡於筐篚  
社養宗人學招邑子能事具舉令問允穆璽書  
改印緹油轉轂壁挂胡牀舍畱官犢人吏老幼  
涕泗號哭頌德豐碑圖形華屋閱實數美移畧  
更僕

故右豹韜衛長史賜丹州刺史任君神道

碑并序

君諱某字某其先奚仲之後於周爲上卿世有  
功列於諸侯氏則住鬱爲著族後有官於京兆  
者子孫因家焉今爲萬年縣人也遠祖某漢河  
東太守曾祖某周清河太守先復舊職異世而  
同符祖某隋梁州南鄭縣令父某皇石州離石  
縣令不墜象賢一門而二鳧焉皆爲政以德遺  
愛在人能高其門必有興者雖不當代果生達  
人君離石府君之第某子也膺一賢之期鍾累

葉之善忠孝自得稟乎天姿詩禮輔成潤以庭  
訓文含四始雕蟲之技附庸武有七德啼猿之  
術居外明經者皓首弱歲成儒達法者腐脣端  
居曉吏以鄉貢明經擢第解褐益州新都尉居  
無何丁母憂廬以長號淚少於血杖而後起骨  
餘於形彈琴不成從先王之禮捧筐便慟有終  
身之哀服闋授左金吾衛兵曹參軍轉左衛錄  
事參軍又遷右豹韜衛長史王樂爲用率武夫  
以扞城人愛其才稱君子之爲衛方將冠章甫

之冠衣縫掖之衣奏議雲臺論政赤墀一見天子必為之前席三說大臣必為之解印若端委以相六合盡宅心於帝庭授鉞以董八蠻可傳首於魏闕然後挂冠東郡拂衣五湖高蹈煙虹笑謝珪組天命不祐沮我良策春秋若干以某年月日寢疾卒於永興里第某年月日葬於京兆神禾舊作和非原禮也嗣子曰某善繼先志克成厥家多藝多才安英實選匪實寶十城之價不以力聞萬夫之敵命同御座漢帝以恩待故

人超將中軍先軫以才登元帥以某年月日從駕謁五陵天子若曰自古明王舊作三非因心以孝待人由已以施物故休戚共憂樂同也其贈羽林將軍任某父使持節丹州諸軍事丹州刺史敬其事則命以始寵其身以及其親明主所以盡心忠臣所以盡力故羊舌職悅是賞也陳力異代官成聖朝修文下泉名在天爵前賢陰德雖貽慶於後昆胤子揚名乃大顯於先父養則致樂沒而有稱昔也為士享唯將軍之食今則

典邦葬亦諸侯之禮皇帝命之太史書之報昊天之恩曾舉世未有豈與夫手樹行櫛躬廬長松負土成墳備身以葬匹夫之孝同年而語哉君少有大略長而能賢安於仁樂於善厚生以儉守智以愚視事舊作是非所及筆硯盈庭其力文也容膝之外圖書滿屋其嗜學也八體之能右軍曾未知翰五弦之妙中散何擅於琴以禮庇身以清守官惟邦之彥惟國之翰夫人河東裴氏始以某為光祿也封河東郡君及是又贈河

陸信

東郡太君子之忠由母之教母以子貴不亦宜乎司文者執簡以往刊石旌德其詞曰薛侯之裔兮代濟其美不隕其名是生碩德兮為世作程忠不祐孝不福兮早謝休名身為士兮子為卿文將羽林兮統天兵天子寵兮為崇榮贈我武符兮賜我專城青松寂寂兮晝無人聲狗不吠兮雞不鳴蒼茫千古兮孰云旌賴孝子兮揚音英

大唐故臨汝郡太守贈秘書監京兆韋公

神道碑銘 并序

坑七族而不顧赴五鼎而如歸徇千載之名輕  
一朝之命烈士之勇也隱身流涕獄急不見南  
冠而紩遜詞以免北風忽起刎頸送君智士之  
勇也種族其家則廢先君之嗣戮辱及室則累  
天子之姻非苟免以全其生思得當有以報漢  
棄身為餌俛首入橐偽就以亂其謀佯愚以折  
其僭謝安伺桓溫之亟蔡邕舊作邕非制董卓之邪  
然後吞藥自裁嘔血而死仁者之勇夫子為之

公諱某字某京兆杜陵人也昔豕韋氏主盟於  
商後扶陽侯重世相漢高祖某官父某某官並  
勲德茂著史謀詳焉公即文貞公之仲子也初  
以宰相子弁髦署吏抱拜授封加朝散大夫封  
平樂郡公累拜某官丁父貞公憂又丁某國夫  
人憂無容顧禮殆不勝喪終身之痛歷稔猶毀  
幼無童心長積純氣抱其天素立於人紀先聖  
微言宿儒未辨貫穿精義總括旁說文言蔚於  
興表筆態托於力外子虛上林敢云雄似黃庭

團扇方議鴈行鶴氅之姿。羊車奪映會選公壻。詔婚王室。天家焜燿。獨任素風。時論騰踊。宜在右職。乃拜中書舍人。動翔鳳之詠。啓迪古詩。下流水之書。敦崇雅誥。轉太常少卿。六宗九奏。悉具其儀。天神地祇。可得而禮。俄入覲。累貶巴陵太守。稍遷壽春太守。又遷臨汝太守。其理務教訓。其政尚寬簡。謂其叙在六官。又踐三事。疇咨帝載。必歌九功之德。式和人則。必復三代之英。天子避其用。親奸臣惡其異。已馮衍竟廢揚雄。

何鑰

不遷抑古人而有之。何夫子之命也。逆賊安祿山吠堯之犬。驅彼六騾。憑武之狐。猶威百獸。藉天子之寵。稱天子之官。徵天子之兵。逆天子之命。始反幽薊。稍逼溫洛。云誅君側。尚惑人心。列郡無備。百司安堵。變折衝爲賊矣。兼法令而盜之。將逃者已落穀中。謝病者先之死地。密布羅網。遙施陷穽。舉足便跌。奮飛卽挂。智不能自謀。勇無所致力。賊使其騎劫之。以兵署之。以職以拏爲質。遣吏挾行。公潰其腹心。候其間隙。義覆



元惡以雪大恥。嗚呼上京既駭。法駕大遷。天地不仁。穀洛方鬪。鑿齒入國。磨牙食人。君子爲投檻之猿。小臣若喪家之狗。僞疾將遁。以猜見囚。勺飲不入者。一旬。穢溺不離者。十月。白刃臨者。四至。赤棒守者。五人。刀環築口。戟枝入頸。縛送賊庭。實賴天幸。上帝不降罪疾。送賊恻瘻在身。無瑕戮人。自憂爲厲。公哀予微節。私予以誠。推食飯我。致館休我。畢今日歡。泣數行下。示予佩玦。斫手長吁。座客更來。附耳而語。指其心曰。積

憤攻中。流痛成疾。恨不見戮。專車之骨。梟枕鼓之頭。焚骸四衢。然臍三日。見子而死。知予此心之明日而卒。某年月日。絕於洛陽某之私第。以某月日。返葬於某原。禮也。皇帝中興。悲憐其意。下詔褒美。贈秘書監。天下之人。謂之賞不失德矣。公敦穆孝友。明允篤誠。高居化源。濡跡物軌。元昆日陟。伯與仲居。愛之欲無方。視之若不足。薄其私而厚其室。抑謙已而讓其名。故有靈芝聳蓋。嘉木連理。時人以爲孝悌之祥。而公昆季

謙而不以聞也。維穉弱之契，晚年彌篤。吾實知之，能言老乃爲銘曰。銘七

大唐大安國寺故大德淨覺師碑銘 并序

光宅真空心王之四履，建功無旱法將之萬勝。故大塊羣籟無弦出法化之聲，恒沙衆形爲寶嚴之色。至和六師北亂，四諦祖征，開甘靈狹小之門，出臭煙朽故之宅。踞寶牀而搖白拂，徐誘草菴沃金瓶而繫素繒，遂登蓮座，足使天口雄辯。刮語燒書，河目大儒，培仁擊義，斯爲究竟。孰

不歸依禪師法名淨覺俗姓韋氏。孝和皇帝庶人之弟也。中宗之時，後宮用事，女謁寢盛，主柄潛移，戚里之親，同分珪組，屬籍之外，亦縮銀黃。況乎天倫將議，封拜促尚，方令鑄印，命尚書使備策，詰朝而五土開國，信宿而駟馬朝天。禪師歎曰：昔我太師尚以菩提釋位，今我小子欲以恩澤爲侯，仁遠乎哉！行之卽是裂裳裹足，以宵遁乞食餬口，以兼行入太行山，削髮受具，尋某禪師，故蘭若居焉。猛虎舐足，毒蛇熏體，山神獻

果天女散花澹爾宴安曾無喜懼先有涸泉枯  
柏至是布葉跳波東魏神泉應焚香而忽湧北  
天衆果候飛錫而還生禪枝必復之徵法水再  
興之象聞東京有順大師乃脫履戶前摳衣座  
下天資義性半字敵於多聞宿植聖胎一瞬超  
於累劫九次第定乘風雲而不留三解脫門揭  
日月而常照雪山童子不顧芭蕉之身雲地比  
丘欲成甘蔗之種大師委運遂廣化緣海澄而  
龍額珠明雷震而象牙花發外家公主長跪獻

衣薦紳先生却行擁篲乞言於無說請益於又  
損天池杯水遍含秋月之輝草葉樹根皆霑宿  
雨之潤不窺世典門人與宣父中分不受人爵  
廩食與封君相比至於律儀細行由米護持經  
典深宗毫釐剖析窮其二翼卽入佛乘趣得一  
毛亦成僧寶於是同凡現疾處順將終忽謂衆  
人有疑皆問我於是夜當入無餘開口萬言音  
和水馬踴身七樹光映天人如斲出行泯然跌  
坐以某載月日歸大寂滅某月日遷神於少陵

原赤谷蘭若香油細氎用以茶毗合璧連珠爲  
之葬具城門至於谷口幡蓋相連法侶之與都  
人縞素相半叩膺拔髮灑水空塵升堂入室之  
徒數踰七十破山澍海之哭聲振三千則有僧  
某乙尼某乙故惠莊某氏某郡主賢者某乙等  
各在衆中爲共上首或行如白雪或名詎紅蓮  
或爲勝鬘夫人或稱毗邪居士舊作七非二空法外  
何處進求七覺分中誰當決釋猶依舍利翼獲  
菩提身塔不出虎溪淚舊作淚非碑有同羊峴表心

何鑑

成相相非離於真如敘德以言言豈著於文字  
乃爲銘曰小三千界後五百年空乘玉牒莫翻  
余仙無量義處如來之禪皆同日論誰契心傳  
其一弟在人間各歸鳳闕去日畱訓別時剪髮累  
賜金錢將加印紱忽爾宵遁終然兩絕其二救頭  
學道裹足尋師一花寶樹八水香池戒生忍草  
定長禪枝不疑少父更似嬰兒其三旣立勝蟠併  
摧邪網利眼金翅圓身寶掌巧撮死龍能調老  
象魔種敗壞聖胎長養其四生滅度五陰虛空

無說無意非異非同此身何處彼岸成功當觀水月莫怨松風其五

能禪師碑

并序。唐文粹上有六祖字。下有銘字。凡一作見文粹。

無有可捨是達有源無空可住是知空本離寂非動乘化用常在百法而無得周萬物而不殆鼓柂海師不知菩提之行散花天女能變聲聞之身則知法本不生因心起見見而可取法則常如世之至人有證於此得無漏不盡漏度有為非無為者其惟我曹溪禪師一本下有乎禪師三字俗

姓盧氏某郡某縣人也名是虛假不生族姓之家法無中邊不居華夏之地善習表於兒戲利根發於童心不私其身臭味於耕桑之似苟行一作適其道一作羶能一作行於蠻貊之鄉年若干事黃梅忍大師願竭其力即安於井臼素剝其心獲悟於稊稗每大師登座學衆盈庭中有三乘之根共聽一音之法禪師默然受教曾不起予退雪其私迴超無我其有猶舊本猷非懷渴鹿之想尚蓬斷筍之跡香飯未消弊衣仍覆皆曰升堂入

室測海窺舊作扇非天謂得黃帝之珠堪受法王之

印大師心知獨得謙而不鳴天舊作回非何言哉聖

與仁豈敢子曰賜也吾與汝弗如臨終遂密授

以祖師袈裟舊作娑非而謂之曰物忌獨賢人惡出

已吾一作予且死矣汝其行乎禪師遂懷寶迷邦

銷聲異域衆生爲淨土雜居止於編人世事是

度門混農商於勞侶如此積十六載南海有印

宗法師講涅槃經禪師聽於座下因問大義質

以真乘既不能酬翻從請益乃歎曰化身菩薩

在此色身肉眼凡夫舊作大非願開惠眼遂領其一作

徒屬盡詣禪居奉爲挂衣親自削髮於是大興

法雨普灑客塵乃教人以忍曰忍者無生方得

無我始成於初發心以爲教人以首至於定無

所入慧無所依大身過於十方本覺超於三世

根塵不滅非色滅空行願無成卽凡成聖舉足

下足長在道場是心是情同歸性海商人告倦

自息化城窮子無凝直開寶藏其有不植德本

難入禁門未繫空花之狂曾非思日之咎常歎

奇字齋

文集卷三

三

曰七寶布施等恒河沙億劫修行盡大地墨不  
如無爲之運無礙之慈弘濟四大生庇三有旣  
而道德遍覆名聲普聞泉館卉服之人去聖歷  
劫塗舊作身穿耳之國航海窮年皆願拭目於  
龍象之姿忘身於鯨鯢之口駢立於戶外趺坐  
於牀前林是旃檀更無雜樹花惟簷蔔不嗅餘  
香皆以實歸多離妄執九重延想萬里馳誠思  
布髮以奉迎願叉手而作禮則天太后孝和皇  
帝並敕書勸諭徵赴京城禪師子牟之心敢忘

鳳闕遠公之足不過虎溪固以此辭竟不奉詔  
遂送百衲袈裟及錢帛等供養天王厚禮獻玉  
衣於幼人女后宿因施金錢於化佛尚德貴物  
異代同符至某載月日中忽謂門人曰吾將行  
矣俄而異香滿室白虹屬地飯食訖而敷坐沐  
浴畢而更衣禪指不畱水流燈焰金身永謝薪  
盡火滅山崩川竭鳥哭猿啼諸人唱言人無眼  
目列郡慟哭世且空虛某月日遷神於曹溪安  
座於某所擇吉祥之地不待青鳥變功德之林

皆成白鶴。嗚呼大師至性淳。一天姿貞素百福。  
成相衆妙會心。經行宴息皆在正受。談笑語言  
曾無戲論。故能五天重跡。百越稽首。修虵雄虺  
毒螫之氣。銷跳爻彎弓。猜悍之風。變畋漁。悉罷  
蠱醜。知非多絕。羶腥効桑門之食。悉棄罟網。襲  
稻田之衣。永惟浮圖之法。實助皇王之化。弟子  
曰。神會遇師於晚景。聞道於長中。一作年廣量出  
於凡心。利智踰於宿學。雖未後供樂。最上乘。先  
師所明。有類獻珠之願。世人未識。猶多抱玉之

應鍾

悲。謂余知道以頌。見託偈曰。五蘊本空。六塵非  
有。衆生倒計。不知正受。蓮花承足。楊枝生肘。苟  
離身心。孰爲休咎。其至人達觀。與佛齊功。無心  
捨有。何處依空。不着三界。徒勞八風。以茲利智  
遂與宗通。其愍彼偏方。不聞正法。俯同惡類。將  
興善業。教忍斷嗔。修慈捨獵。世界一花。祖宗六  
葉。其大開寶藏。明示衣珠。本源常在。妄轍遂殊。  
過動不動。離俱不俱。吾道如是。道豈在吾。其道  
遍四生。常依六趣。有漏聖智。無義章句。六十二



種一百八喻悉無所得應如是住其五

大薦福寺大德道光禪師塔銘并序

禪師諱道光本姓李緜州巴西人其先有時有流若實有蜀蓋子孫爲民大父懷節隱峨嵋山行無轍跡其季父榮爲道士有文知名禪師幼孤在諸兒其神獨不偶家頗苦乏絕玄詣鄉校見周孔書曰世教耳誓苦行求佛道入山林割肉施鳥獸鍊指燒臂入般舟道場百日晝夜經行遇五臺寶鑑禪師曰吾周行天下未有如爾

可教遂密授頓教得解脫知見舍空不域卽動無朕不觀攝見順有離覺毛端族舉佛刹掌上斷置世界不覩非答應度方知其門者寡故道俗之煩而息化城指盡謂窮性海而已焉足知恒沙德用法界真有哉春秋五十二夏以大唐開天二十七年五月二十三日入般涅槃於薦福僧坊門人明空等建塔於長安城南畢原人天會葬涕泗如雨禪師之不可得法如此其世行遺教如一切賢聖維十年座下俯伏受教

欲以毫末度量虛空無有是處誌其舍利所在而已銘曰嗚呼人天尊全身舍利在畢原

故任城縣尉裴府君墓誌銘

天寶二年正月十二日唐故魯郡任城縣尉河東裴府君卒於西京新昌坊私第享年三十九嗚呼哀哉君諱同字玉溫河東聞喜人也曾祖弘春皇雍州錄事參軍贈上黨長史祖思義皇侍御史吏部員外左司郎中戶部吏部侍郎河東郡太守晉城縣開國子父敷珍皇薛王府騎

曹參軍自晉已降世爲冠族令德不替以至於君夫其事親孝兄弟順與朋友信其從政公平而壽不中年官才一命慈母在堂諸弟未仕兒未有識女且嬰孩妻天於前身歿於後天可問邪其若老親何其若季仲諸孤何生人之悲莫甚於是家貧祭以棗脯殮以時服以某月日祔葬於鳳樓原先府君之塋嗚呼有河東裴子之墓誌之蓋古有之繼後之知者亦何有哉銘曰一死萬紀終天不復爲之奈何哀哀慟哭覆載

至廣庶類繁育萬物方春而就於木

工部楊尚書夫人贈太原郡夫人京兆王

氏墓誌銘 并序

夫人諱某京兆霸城人也晉出三家公子尊於魏國秦亡六國時人謂之王家河南則分虎臨人華陰則老熊當道高祖德真皇左僕射祖九思京兆府三原縣令父潛河南府郟城縣令六名之後重光不替夫人令儀淑德發於天姿閑禮明詩傳乎世業言成女誠可著於縑緗行爲

女師詎資於行待豈止彈琴吐論誦賦吟詩而已及乎有行嬪於君子事姑至孝旁穆六姻爲母深慈均養七子男以無雙令德降帝子於鳳樓女則第一解空歸法王之象教閨門之訓朝野稱多旣而家列公侯地連妃主珠翠滿座不御采衣方丈盈前准甘素食同德大師大照和尚觀如來之奧昭羣有之源夫人一入空門便蒙法印朱簾紺幘無復餘乘龍藏寶經悉通至義惠用圓滿誠力堅嚴藥藉茹葷雖愈疾而不

受心已久淨縱沒舊作設非齒而常安以某年月日  
 奄歸大寂於長興里之私第厥初寢疾彌曠旬  
 時駙馬上人柴毀骨立揮淚嘗藥身不解衣泣  
 血持經手不釋卷晝夜懺悔非止六時身命供  
 養寧唯七寶御醫繼踵中使重跡魂兮不反空  
 楚外國之香生也有涯非無上天之樂某月日  
 有詔追贈太原郡夫人襄城石窳增寵其榮名  
 翟第魚軒空悲於象設以某月日安厝於某原  
 禮也功德之至散花天女不畱釋梵之筵勝髮

夫人何在嗚呼哀哉乃為銘曰天生淑德實仰  
 宜家特能柔順深棄嬌奢詎離環珮不御其華  
 其婦道允諧母儀俱美每出誠夫停食訓子賦  
 掩西征書教內史其門容高憲庭列長筵男乘  
 翠鳳女比紅蓮繁華貴里寂寞安禪其朝舍香  
 兮禮闈夕青瑣兮黃扉方天公兮密啓建出牧  
 兮高麾俄八守兮京兆賜黃金兮被阜衣其捐  
 余珮兮江中隱思君兮不可窮歌泰山兮不返  
 夢濟洹兮遂空素車兮透遲宛鄉關兮故待望

國門兮不入。到秦山兮不知。瞻舊域兮松楸平。原夕兮素漣愁。魂兮歸來江南。不可以久留。

唐故潞州刺史王府君夫人榮國夫人墓

誌銘 并序

夫人姓盧氏。范陽人也。昔堯命伯夷典秩宗。號太常為尚父。桓襄之際。公子食盧。卯金故人。三於大國。越石從事。官至中郎。曾祖士會。隋行臺侍御史。祖某。皇朝奉禮郎。父某。豪淄。叩等三州刺史。持斧衣繡。威加不法。奠玉瘞帛。舉無違禮。

守臨淄而齊兒不詐。去臨邛而蜀物盡留。夫人即府君之長女。積累世之德。鍾二門之美。儀表秀整。進止詳閑。不咨保傅。動由詩禮。既以七族。冠時。遂歸齊大之偶。入持門戶。內事舅姑。枕席溫清于堂上。環珮逶迤于堂下。不脫簪珥。親當澣濯。玄纁可實于筐篚。粢盛可獻于宗廟。魚軒或駕。翟茀而朝。衆婦于是修容。夫人專之以禮。克贊君子。累至大官。雅政清德。實多左右。潞州早世。深秉義方。母儀可則。庭訓不替。女史之學。

多譖大家之書衆婦之儀盡稟夫人之法天與  
盛德不降永年以某月日寢疾薨于長安善和  
里享年若干以某月日合祔某山原禮也子某  
某官淳孝之性泣血待盡永惟令德固不可泯  
彰示後人乃刊于石銘曰有姜之後或邑于廬  
歷示種德示有稱孤從事文府振轡長途其一憲  
府持法奉常秉禮皇考專城腰章邸邸厚德重  
跡深仁繼體其二降生哲人其行惟惇儻形衆庶  
門列諸姒齊姜宋子敢望清塵其三君子之貳實

聞高義乃躬澣濯先晨簪珥穆及外親敬是中  
饋其四母儀既峻庭訓載揚子以才貴煌煌寵章  
馳暉難駐令問空長其五壽宮既啓高堂永寂千  
秋萬古山川松柏紀德誌行唯茲貞石其六

沂陽郡太守王公夫人安喜縣君成氏墓

誌銘 并序

夫人字某某郡人也其先周成王之後古之錫  
姓命氏或以先父之職官或因始祖之名謚漢  
魏以降史牒詳焉曾祖休寧某官祖某某官襲

封常山公貳公執帛調護儲闈尤伯剖符典日  
方兵漢雄左輔實拜翁歸周命僕臣惟茲伯罔  
夫人卽太僕府君之第二女也世有明訓家無  
遺德蕙心紈質豈曰師成臻首蛾眉抑惟天與  
同雲降雪常聞柳絮之詩獻歲發春卽賦椒花  
之頌言事姑舅宜其家室寢門纔闕筭六珈而  
問安擊鐘未晞具八籩而獻饋染朱與綠不愆  
公子之衣采藻及蘋有甚季姜之祭魚軒翟菲  
爲諸侯之夫人鳴佩垂環對有國之君子綺疏

寓目助選賢人青帳藩身用酬高論善持門戶  
能睦族姻誠良人之從畋不啻原獸訓愛子之  
爲政遂返池魚言成大家之書行爲衆婦之法  
至於彈琴製賦纂組攻書具舉百事之能仍居  
四德之外嗚呼降年不永春秋五十以某載月  
日薨於長安平康里之私第某月日祔於咸陽  
洪瀆原之先塋禮也不獲偕老空傷奉倩之神  
未始有生誰達莊周之理長子濡前某官次子  
澄某官次曰某某官及女等漣漣泣血築築在

疾哀纏聖善痛七子之無依文敘寒淵與九原  
 之可識銘曰齊侯之子兮衛侯之妻膚如凝脂  
 兮手如柔荑奉初之嘉訓兮淑德日躋供養兮  
 姑舅簪珥問安兮先夜漏製三縑兮玄纁具五  
 獻兮籩豆翟裼兮錦衣駕魚軒兮來歸從如雲  
 兮滿中闈忽形沉兮影絕夫傷神兮子泣血悲  
 餘澤兮猶在怨迴文兮未滅返葬兮咸陽寒天  
 暮兮渭水長嗟梧桐兮半死無雙飛兮鳳凰  
 唐王右丞文集卷之三 丙辰端午旦室列

唐王右丞文集卷之四

唐 太原 王 維 謨  
 明 武陵 顧起經 編

哀辭祭文

宋進馬哀辭 并序○凡一  
作見劉校本

宋進馬者中書舍人宋公之子也公無弟兄子  
 一而已交則有擇一作文  
則有種德亦惟肖忽疾倏逝  
 醫不及視宋公哀之他人悲之故為詞曰  
 背春涉夏兮衆木藹以繁陰連金華與玉堂兮



宮閣鬱其沈沈百官並入兮何語笑之啞啞君  
獨靜默以傷心草王言兮不得辭裁悲減思兮  
少時僕夫命駕兮出闔闔歷通達陌上人兮如  
故識不識兮往來眼中不見兮吾兒驟紫駟兮  
從青驪低光垂彩兮况不知其所之闢朱戶兮  
望華軒意斯子兮候門忽思瘞兮城南心贅亂  
兮重昏仰訴天之不仁兮家唯一身身止一子  
何胤嗣之不繁就單斟而又死將青白兮遺誰  
問詩禮兮已矣哀舊作從中兮不可勝豈暇料

何鉉

天

一作餘

年兮復幾日黯黯兮隕

一作頽

暉鳥翩翩

兮疾飛邈窮天兮不返疑有日兮來歸靜言

兮永絕復號叫

一作驚

兮沾衣

客有弔之者曰觀

未始兮有物同委蛻兮胡悲且延陵兮未至況

西河兮不知學無生兮庶可幸能聽於吾師

祭兵部弟郎中文

為人作

維載月日朔某官某乙謹以酒脯之奠敬祭於  
故兵部郎中房公之靈嗚呼君子之才周而不  
器苟求行道未嘗私身沈靜好謀話言必雅往

奇字齋

文美卷四

三

歲穀貴關輔阻飢眷命自天發廩以賑中朝乏  
使屬之鄙夫不敢自賢請子爲介匹夫嫠婦黃  
口之孤鍾釜之施罔不必當舉無棄粒野有頌  
聲國家厭兵革苦徵戍大召浮食以靖國人輦  
車諭旨萬里窮磧西度赤坂館於烏孫形勞者  
病神勞則天棄成功於末路未復命而言謝死  
不廢命忠也尸而加紳寵也我盥而撫子瞑受  
舍求仁得仁其誰不死玉關之下素車威遲愁  
雲晝聚白雪春下絳旄從風車徒行哭至上京

而不駐將返葬於關東河活活而東注天慘慘  
而悲風道路猶長子實途窮人世如舊子實成  
空我有旨酒以歆以餞想像明德歔歔出涕尚  
饗

爲楊郎中祭李員外文

維載月日朔行尚書司勳郎中賜緋魚袋楊  
璋等謹以清酌少牢之奠敬祭於故左司員外  
郎李公之靈嗚呼大朴難名大辯若訥治兮無  
兆汎然隨物直而好學敏以從事行隱於寡言

文成於沈醉，澡身浴德，唯仁與義，讀書甚解，作賦彌工，麗詞秀務，奧義玄通，記言西掖，起草南宮，第五將姪，伏波事嫂，食先與甘，衣必讓好，口嘗其糲，身席於藁，結友一言，同官一日，徇我朋好，忘其身恤，豈惟攜手，亦將加膝，明明天子，惟賢是思，恨為唐之已老，喜相如之同時，罷刊書於虎觀，將載筆於鳳池，嗚呼病時，七啓臥內，一訣痛乾坤而忽窮，嗟古今而長絕，永言北首，返葬東周，何夫子之適去，同衆人之若休，歷千門

而行，哭動九陌，而增愁，馬悲鳴而笳咽，雲寡色而風秋，玄璋等或結髮舊遊，比肩同列，悲薤歌之首路，哀柳車之就轍，嗟無見而空來，痛不知而成列，嗚呼哀哉，尚饗。

爲兵部祭庫部王郎中文

惟公弘量碩德，抱義戴仁，早離我見，常守吾真，朝稱端士，世謂淳人，夏官之職，惟賢是寄，旣節五官，兼選騎士，宿衛扞城，必由茲地，速應爲敏，平分是貴，決遣先馳，曹無畱事，嗚呼積善無慶

寢疾彌留唐肆求馬夜壑藏舟深悟幻境獨與  
道遊死而不忘魂兮若休嗚呼某等何幸得備  
官屬泰然若春溫兮如玉去德何永事生何促  
五情如喪自身不贖敬薦醴牢哀哀慟哭尚饗

爲人祭李舍人文

年月日某以茶藥之奠祭於故舍人李公之靈  
嗚呼見人多矣未有如子生於德門長於貴里  
名高江夏之重貌奪河陽之美行比曾顏才兼  
文史含恣輕肥仰偃紈綺惡如涕唾棄如塵滓

比布衣以同年甘蔬食而沒齒嗚呼深入度門  
高居道源獨一靜處寂默無言待草誠之真性  
歸化光之法尊曠無淨染頓離塵根豈期昨日  
分首別離未久萬法皆空一生何有無餘涅槃  
應無所受無漏智慧斯爲不朽予以凡情哀哀  
其後世相謂然道心斯醜敢不從俗子其無咎  
爲人祭某官文

惟公弘量碩德寡言敏行直而能婉和而不競  
孺墨爲鋒鏑在顏冉之季孟白雲刑官繡衣使

者時無冤人路多避馬既踐文昌來司武庫翼  
翟車之高足爲鳳池之先路豈期位薄德崇才  
遠途窮拜命之時初一朝於北闕移疾於外不  
再入於南宮嗚呼哀輓悲笳寒天疎木宅不卜  
地祔於故塋家無餘財斂以時服弟難會葬兒  
未及哭其營護而奠遣惟甥姪與姻族某嘗同  
官實喜良友仰德彌高立言不朽居常接膝未  
忍分手況永訣兮無期向空筵而灑酒尚饗

爲羽林將軍祭武大將軍文

維年月日將軍某等謹以清酌少牢之奠祭於  
故大將軍武公之靈嗚呼武公命代出羣氣蓋  
朔方勇冠六軍生長下國聲聞上天天子壯之  
命居北門北門伊何國之重寄羽林孤兒旄頭  
突騎罔不畢勸爲之元帥帝在紫微與君爲衛  
身恒披堅手不捨銳出乘天駟入並東第同官  
爲寮出入五世顧我軍旅凜然遺風一日之長  
萬夫之雄身雖有極德不可窮嗚呼門館蒼黃  
風景淒涼櫪馬悲鳴角弓不張弔客接武哭聲

滿堂嗚呼凡人有喪匍匐斯救況我武公屢及其靈盥而撫之哈玉當受敢不嗣事如公之舊  
爲崔常侍祭牙門姜將軍文

維大唐開元二十五年歲次丁丑十一月辛未朔四日甲戌左散騎常侍河西節度副大使攝御史中丞崔公致祭於故姜公之靈嗚呼天子命之建旗西門帶甲十萬鐵騎雲屯橫挑強胡飲馬河源嗟爾勇健表爲牙門牙門伊何全齊大族四方有事誓死鳴轂前有血刃後有飛鏃

其氣益振大呼馳逐翩翩白馬象弧雕服戈矛其喉矢集其目嗚呼天下無事今上好文爾有餘勇莫敢邀勳腰鞬白首蹉跎塞雲死於裨將誰統前軍家本秦人靈車東驚長天積雪邊城欲暮麾下行哭前旌抗路身有寶劍不佩而去轅有代馬悲鳴踟顧嗚呼我誠軍吏今送爾歸旣素我服亦朱其衣黠虜未滅壯士長辭牢醴以祭太息獻歆尚饗

爲王常侍祭沙陁鄯國夫人

維年月日朔河西節度使左散騎常侍王公遣  
總管石抱玉以酒牢之奠致祭於故沙陀蕃國  
夫人之靈嗚呼惟此淑德降於異域至性不師  
天姿靡飾禮容詎假於環珮工藝非因於組織  
行闈訓於穹廬成母儀於蕃國懿此清範夫人  
之則沙陀令門外家之力嗚呼夫人歸命于戈  
遂寢子孫扞城國家高枕居之右地革其左衽  
散辮垂鬟解裘衣錦嗚呼降年不永遠日方臨  
寂矣高堂飲珠含玉哀哉貴女刃面摧心嗚呼  
聖朝命我護此諸蕃夫人所出天子加恩能守  
漢制不効夷言馬無北首車必南轅教義所及  
忠信彌敦寶嘉內訓用潔斯樽尚饗

壬辰辰月初拾日

快堂林士億甫朱句全

唐王右丞文集卷之四終

奇字齋

吳應龍書

余閱唐宋志及經籍考藝文略與夫遂初堂秘閣二書目悉稱公集十卷其文居十之四已梓於洞庭徐少宰所余既爲公勒成詩箋而復以其文編校而并刻之斯爲全書矣惜吳刻舊多錯漏今用叅之文粹英華洎劉會孟本迺糾其失款者八字補其脫缺者十七字更其差者三十四字總五十九字俾讀者有驗於高簡而無迷於帝虎也不亦爲藝圃一快邪

歲丙辰日北至夫湫山人顧起經跋

